

Nihánj me 'o yanj cartá qui'yaj síí cu'naj Pabló ca'néé so' rihaan nij yuvii noco' man Diose yanj chuman' cu'naj Tesalónica a

1 Síí cu'naj Pabló do', síí cu'naj Silvano do', síí cu'naj Timoteo do', me núj, ne tu'va taran' núj avii 'yaj núj yanj nihánj ca'nej núj rihaan nij soj sij yanj chuman' cu'naj Tesalónica sij noco' man Rej ní' Diose do', man Jesucristó sij 'nij ra'a man ní' do' a. Me rá núj qui'yaj ndo'o Diose se luj che'é soj, ne me rá núj gaa xej nimán soj, qui'yaj Diose a.

Nana nihánj taj xna'anj se vaa nij síí cuchumán rá ni'yaj man Jesucristó yanj chuman' cu'naj Tesalónica ro', sa' uxrá noco' nij so' man Diose a

²Niganj nago' núj graciá rihaan Diose che'é cunudanj soj, ne gaa achín ni'yaj núj rihaan Rej ní' Diose, ne achín ni'yaj ndo'o núj che'é taran' nij soj ei. Dan me se yo'o ³nuú rá núj se vaa qui'yaj suun ndo'o soj che'é se amán rá soj ni'yaj soj man Jesucristó, ne caran' rá soj ni'yaj soj man so', ne nuu rá núj se vaa ne'en soj se vaa cavii sa' soj qui'yaj Jesucristó sij 'nij ra'a man

ní' vaa güiii, ne che'é dan yo'o a'néé nimán soj qui'yaj suun soj che'é so' adonj. ⁴Dan me se 'ee rá Diose man soj, tinuj, nocoj. Ne ne'en núj se vaa narii Diose man soj canoco' soj man so' adonj.

⁵'O se cuno soj nana sa' nana nata' núj rihaan soj, ne ne cuno rma'an soj nana yo' ma'. Dan me se gaa cuno soj nana yo', ne yuun che'e guun ya rá soj se vaa nana ya me yo', ne guun nucuj ndo'o soj canoco' soj nu' nana yo' ei. 'O se Nimán Diose ne ga soj ei. 'O se gaa cane núj ga soj, ne quene'en soj daj qui'yaj núj che'é se me rá núj cavii sa' soj a. ⁶Ne ase qui'yaj guee núj do', ase 'yaj guee síí 'nij ra'a man ní' do', danj qui'yaj guee soj chuguanj. Dan me se nda' se quiran' soj sayuun qui'yaj nij yuvii ne amán rá ni'yaj man Jesucristó, tzaj ne yo'o canoco' soj se-nana Diose, ne guun niha' rá soj, qui'yaj Nimán Diose adonj. ⁷Ne cunudanj nij yuvii noco' man Diose man estadó Macedonia do', man estadó Acaya

do', xcaj nij so' cuentá che'é se vaa qui'yaj soj, ne danj qui'yaj guee nij so' uún ei.

⁸Dan me se aj cuno ndo'o yuvii se-nana síi 'nij ra'a man ní', qui'yaj soj, ne dan me se nuveé inanj nij yuvii man estadó Macedonia do', nij yuvii man estadó Acaya do', me yuvii cuno nana se vaa amán rá soj ni'yaj soj man Diose ma'. 'O se yuvii man rihaan nu' cachra' chumii me yuvii cuno nana yo' nanj adonj. Che'é dan me taj che'é cataj xna'anj núj rihaan nij yuvii che'é se vaa qui'yaj soj ma'. ⁹Ma'an nij yuvii taj xna'anj rihaan tuvi' nij so' se vaa ve'é uxrá ca'mii soj ga núj gaa cayáán núj ga soj, ne taj xna'anj nij so' se vaa tanáj soj ya'anj canoco' soj gaa rque, ne dan me se chruun cacój soj do', yahij cacój soj do', me nij ya'anj yo', ne yaj me se canicaj soj canoco' soj man Diose síi vaa i'na' ya ya, ¹⁰ne na'vij soj ca'na' uún ma'an Jesucristó ta'níi Diose rej xta' a. Ne Jesucristó ro', me síi cunuu i'na' ya uún qui'yaj Diose gaa cavi' so', ne tinanii Jesucristó man ní' rihaan sayuun asa' quisíj güii caxrii yuvaá Diose man nij síi tumé cacun' ne qui'yaj Diose sayuun man nij so' ei.

Nana nihánj taj xna'anj se vaa ve'é tucu'yón síi cu'naj Pabló se-nana Diose nana sa' rihaan nij síi cuchumán rá ni'yaj man Jesucristó yanj chuman' cu'naj Tesalónica a

2 Ne'en ma'an soj se vaa cavii sa' suun qui'yaj suun núj gaa cayáán núj ga soj, tinuj, nocoj. ²Dan me se asino yaan quiran' núj sayuun chuman' Filipos, ne nachri'

ndo'o nij síi man chuman' yo' ni'yaj nij so' man núj, tzaj ne che'é se sij noco' man Diose me núj, che'é dan nda' se sayuun ndo'o vaa nata' núj se-nana Diose nana sa' rihaan soj qui'yaj nij síi man chiháán soj, tzaj ne ne cuchu'vi' núj ma'. Tananj ca'neé nimán núj nata' núj doj nana sa' rihaan soj a.

³Vaa che'é a'mii natáj núj se-nana Diose rihaan soj, ne dan me se nuveé sij noco' tucuáán ne me núj ma'. Ne quij vaa nimán núj ma'. Nuveé sij tiha' yu'unj man yuvii me núj ma'. ⁴O se guun nucaj rá Diose man núj, ne ca'ne' so' suun rihaan núj nata' núj se-nana so' nana sa', ne danj 'yaj guee núj adonj. Ne uun rá núj se vaa cataj yuvii se vaa ve'é 'yaj núj ma'. Maan se me rá núj guun niha' rá Diose ni'yaj Diose man núj, ne che'é dan 'yaj suun núj che'é Diose, ne Diose me síi acaj cuentá che'é núj daj vaa nimán núj adonj. ⁵Ne'en soj do', ne'en ma'an Diose do', se vaa ne ca'mii ya'anj ndo'o núj ga soj che'é rej ca'vee ca'nee núj sa'anj man soj ma'. ⁶Ne guun rá núj cataj soj do', cataj yo'ó yuvii do', se vaa ve'é 'yaj núj ma'. Nda' se Jesucristó me síi cune' man núj guun núj apóstol nata' se-nana so', tzaj ne ne cachinj núj rasuun rihaan soj ma'.

⁷Tananj ase 'yaj nij chana ga ta'níi chana ro', danj qui'yaj núj ga soj gaa cayáán núj ga soj, ne ve'é inanj qui'yaj núj ga soj adonj. ⁸Dan me se cunuu 'ee rá núj man soj, ne che'é dan nuveé inanj se-nana Diose me se vaa rqué núj man soj ma'. Rqué núj se-nana Diose man soj, ne yo'o ca'neé nimán núj qui'yaj suun

núj che'é soj uún adonj. ⁹Dan me se ne'en soj se vaa nuvíi nigan' 'yaj suun núj, gaa ne ri' núj sa'anj, ne ránj ma'an núj se chá núj, ne ne ca'vej rá núj ca'neē núj se chá man soj, man tinuj, man nocoj. Danj inanj qui'yaj núj gaa ca'mii natáj núj se-nana Diose nana sa' rihaan soj adonj.

¹⁰Quene'en ma'an soj do', quene'en Diose do', se vaa sij nica nimán me núj rihaan soj sij amán rá ni'yaj man Diose, ne dan me se qui'yaj núj inanj se me rá Diose qui'yaj núj, ne ne qui'yaj núj cacun' a ma'. ¹¹Ne'en soj se vaa ase vaa 'yaj snó'o ga ta'níi snó'o ro', danj vaa qui'yaj núj ga 'o 'o nij soj, ne dan me se guun nucuj nimán soj, qui'yaj núj, ne narqué núj chrej nucuj man soj ¹²se vaa qui'yaj soj se vaa no xcúun soj qui'yaj soj che'é se narii Diose man soj canē soj ga Diose güii guun chij Diose rihaan chumii nihánj, ne ve'é ndo'o cumān soj ga Diose a.

**Nana nihánj taj xna'anj se vaa
nij síi cuchumán rá ni'yaj man
Jesucristó man chuman' Tesalónica
ro', quiran' nij so' sayuun, qui'yaj
nij síi ne amán rá ni'yaj man
Jesucristó man chiháán nij so' a**

¹³Niganj nago' núj gracia rihaan Diose che'é soj ei. Dan me se gaa cuno soj se-nana Diose nana ca'mii natáj núj rihaan soj, ne ne cataj soj se vaa se-nana yuvií uun me nana yo' ma'. Ya cataj soj se vaa se-nana Diose me nana nata' núj, ne veé ya se-nana Diose me yo' adonj. Ne nuu sa' nimán soj, 'yaj nana yo', che'é se cuchumán

rá soj cuno soj nana yo' ei. ¹⁴O se ase vaa quiran' nij síi noco' man Diose síi man estadó Judea ro', danj quiran' uún soj, che'é se sij noco' man Jesucristó me taran' soj, tinuj, nocoj. Dan me se quiran' nij síi man estadó Judea sayuun, qui'yaj nij yuvií israelitá síi man chiháán nij so', ne quiran' uún soj sayuun, qui'yaj nij síi man chiháán soj ei. ¹⁵Ne xa' nij síi israelitá yo', tzaj ne nij so' me síi ticavi' man Jesucristó sij 'nij ra'a man ní' do', man nij síi nata' se-nana Diose gaa naá do', ne veé uún nij so' canoco' ndo'o man núj, guun rá nij so' go' nij so' man núj uún nanj adonj. Nij ndo'o 'yaj nij so' ni'yaj Diose, ne taj ri'yunj nij so' man cunudanj yuvií uún adonj. ¹⁶Dan me se me rá núj nata' núj se-nana Diose rihaan soj sij yaníj che'é yan quinanii soj rihaan sayuun, tzaj ne aráán ndo'o nij síi israelitá yo' chrej rihaan núj, ne guun nocoo uxrá cacun' quitaj xráá nij so' nu' cavii nu' ca'anj, ne che'é dan yo'o ca'maan rá Diose ni'yaj Diose man nij so', ne yuun che'e quiran' nij so' sayuun, qui'yaj Diose ei.

**Nana nihánj taj xna'anj se vaa
me ndo'o rá síi cu'naj Pablo
quene'en so' man nij síi cuchumán
rá ni'yaj man Jesucristó man
chuman' cu'naj Tesalónica a**

¹⁷Xa' yaj me se guun gan' ya núj doj rihaan chiháán soj doj güii nihánj, tzaj ne 'o nuú rá núj man soj, ne che'é dan me ndo'o rá núj quene'en yucuan' núj man soj, ¹⁸ne che'é dan guun rá núj chui' núj rihaan soj, ne xa' 'unj sij cu'naj

Pabló me se guun que'ee ndo'o me raj cuchij rej man soj, tzaj ne caráán Satanás chrej rihaan núj cuchí' núj rihaan soj ei. ¹⁹Dan me se asa' ca'na' uún Jesucristó rihaan chumií nihánj ne guun niha' uxrá rá núj che'é soj, ne nata' núj rihaan Jesucristó se vaa ve'é canoco' soj man so' qui'yaj núj, ne cavii sa' núj rihaan so' che'é soj ei. Taj vaj yo'ó yuvií 'yaj danj a ma'. ¹⁰ se orún' ya soj me síí 'yaj danj ei. ²⁰ se soj me síí qui'yaj cavii sa' núj, ne soj me síí qui'yaj guun niha' rá núj adonj.

Nana nihánj taj xna'anj se vaa cataj xna'anj síí cu'naj Timoteo rihaan Pabló se vaa sa' uxrá cuchumán rá nij síí man chuman' Tesalónica ni'yaj nij so' man Jesucristó a

3 Che'é dan ne ca'vej uxrá rá núj cané raan taran' núj chuman' nihánj a ma'. Che'é dan cavii raá núj se vaa vij ran' guee rój me síí quinaj chuman' Atenas nihánj, ² ne dan me se ca'née núj man tinú' Timoteo cuchí' so' rej man soj a. Dan me se so' me síí 'yaj suun ndo'o rihaan Diose ga núj suun nata' se-nana Jesucristó nana sa', ne me rá núj racúj so' man soj, narque so' chrej nucaj man soj, ne raan doj canoco' soj man Jesucristó, qui'yaj so', ³ ne a 'ó tuvi' soj se quiri'íj tucuaán noco' soj che'é sayuun qui'yaj yuvií man soj, rá núj a ma'. 'O se ne'en soj se vaa no xcúún ní' quiran' ní' sayuun rihaan chumií nihánj, ⁴ ne gaa cayáán núj ga soj, ne cataj ya núj rihaan soj se vaa xraj, ne quiran' ní' sayuun, ne ne'en soj se vaa ya quiran' ní' sayuun niha'.

⁵ Che'é se me uxrá rá 'unj quene'én 'unj daj quiran' soj, ne che'é dan ca'née 'unj man Timoteo cuchí' so' rej man soj, ne cataj xna'anj so' rihanj daj 'yaj soj noco' soj man Diose, raj a. Dan me se quinano rá 'unj sese aj caxrój síí chree chrej chilíi rque soj do', sese quiri' nu' suun qui'yaj suun núj che'é soj do', raj a.

⁶ Dan me se canicaj uún Timoteo namán so' rihaan núj, ne cataj xna'anj so' se vaa ve'é uxrá amán rá soj ni'yaj soj man Jesucristó, ne ee rá soj tinúú soj, taj so', ne niganj ve'é nuú rá soj man núj, taj so', ne ase vaa me rá núj quene'en núj man soj ro', danj vaa rá soj me rá soj quene'en soj man núj, taj so', ne guun niha' ndo'o rá núj gaa cuno núj se-nana so' adonj. ⁷ Dan me se quiran' ndo'o núj sayuun gaa rque gaa qui'yaj suun núj yan cuchuman rá soj ni'yaj soj Diose, tzaj ne cuano nihánj me guun niha' uxrá rá núj che'é rej nata' Timoteo che'é soj rihaan núj, tinuj, nocoj. ⁸ Dan me se che'é se raan noco' soj man síí 'nij ra'a man ní', che'é dan vaa che'é gaa niha' rá núj qui'yaj suun núj rihaan chumií nihánj adonj. ⁹ Dan me se guun niha' uxrá rá núj rihaan Diose che'é soj, ne che'é dan no xcúún núj nago' ndo'o núj graciá rihaan Diose che'é soj, ¹⁰ ne nuvií nigan' cachinj ni'yaj núj rihaan Diose se vaa ca'vej Diose quene'en núj man soj, ne sese ataa narí' soj nu' tucuaán noco' ní', ne me rá núj narque núj doj chrej sa' man soj, ne sa' doj canoco' soj Diose nanj adonj.

Nana nihánj taj xna'anj se vaa cunuj 'ee rá ní' man cunudanj yuvií a

¹¹ Me rá núj racúj ma'an Rej ní' Diose racúj Jesucristó sij 'nij

ra'a man ní' račuǵ man núj cuchǵ
 núj rihaan soj, ¹²ne ase vaa 'ee rá
 núj man soj ro', danj gaa cunuú
 'ee ndo'o rá soj ni'yaj soj tinúú soj
 do', cunudanj yuviǵ do', qui'yaj sí
 'nij ra'a man ní', rá núj a. ¹³Ndaa
 síj, gaa ne yo'o cunuú sa' nimán
 soj rihaan Rej ní' Diose gaa güii
 ca'na' uún Jesucristó sij 'nij ra'a
 man ní' rihaan chumiǵ nihánj gaa
 cunudanj nij se-mozó so' sí guee,
 ne a 'ó cacun' se tumé soj vaa gaa
 man adonj.

**Nana nihánj taj xna'anj daj
 qui'yaj ní', ne ve'é cuman
 ní' ga nij tinúú ní' a**

4 Yaj me se che'é se sij aj noco'
 man sí' 'nij ra'a man ní' me
 nu' ní' ro', che'é dan cuano nihánj
 me cataj xna'anj núj rihaan soj se
 vaa doj a canoco' soj nu' tucuáán
 noco' soj tucuáán cuchruij núj
 rihaan soj gaa cataj núj daj qui'yaj
 soj gaa mán soj rihaan chumiǵ
 nihánj gaa ne gaa niha' rá Diose
 ni'yaj Diose man soj, tinuj, nocoj.
²O se aj ne'en soj se vaa vaa doj
 nana cataj xna'anj núj rihaan soj
 che'é Jesucristó sij 'nij ra'a man
 ní' nanj á. ³O se nihánj me se vaa
 me rá Diose qui'yaj soj, ne dan
 me se me rá Diose guun soj sí sa'
 rihaan so', ne na'vej rá Diose cotoj
 nij snó'o ga náá guun chana ma'.
⁴Maan se ve'é qui'yaj 'o 'o snó'o,
 nano' so' orún' chana xcaj so', ne
 ve'é qui'yaj snó'o rihaan Diose, ne
 ve'é qui'yaj so' rihaan chana uún a.
⁵Dan me se se guun canoco' soj
 tucuáán noco' nij yuviǵ ne ne'en
 man Diose ma'. Maan che'é se ve'é
 vaa chana rihaan nij so', ne uun rá

nij so' xcaj nij so' man chana, tzaj ne
 ne acaj nij so' cuentá daj qui'yaj nij
 so' taj ya'anj nij so' man chana ma'.
⁶Sese cunó soj nana nihánj, ne se
 guun soj sí tiha' yu'unj man tinúú
 ní' che'é chana ma'. 'O se aj cataj
 ya núj rihaan soj se vaa qui'yaj sí
 'nij ra'a man ní' sayuun man yuviǵ
 tiha' yu'unj man tinúú nanj adonj.
⁷Nuveé che'e se me rá Diose qui'yaj
 ní' cacun' me canacúún Diose man
 ní' ma'. Canacúún Diose man ní',
 tzaj ne che'é rej cunuú sa' nimán
 ní' rihaan Diose me canacúún Diose
 man ní' adonj. ⁸Che'é dan xcaj soj
 cuentá se vaa sí' ri'ij yanij man nana
 nihánj ro', nuveé se-nana yuviǵ me
 ri'ij yanij so' ma'. Se-nana Diose sí
 rque Nimán cunuú nimán ní' me
 nana ri'ij so' nanj adonj.

⁹Dan me se taj che'é cachron 'unj
 nana rihaan yanj cartá nihánj cataj
 xna'anj 'unj rihaan soj se vaa no
 xcúún soj gaa 'ee rá soj man tinúú
 soj ma'. 'O se ma'an Diose me sí
 tucu'yón man soj se vaa qui'yaj soj
 danj adonj. ¹⁰O se danj inanj 'yaj ya
 soj nuu 'ee rá soj man nu' nij tinúú
 ní' sí man estadó Macedonia, tzaj ne
 inanj me rá núj narque núj chrej man
 soj se vaa doj a cunuú 'ee rá soj man
 tinúú ní', tinuj, nocoj. ¹¹Ne guun rá
 soj gaa dínj cuman soj, ne se tiguǵ
 soj man soj rihaan se-suun tinúú
 soj ma'. Maan se ndaa se-suun 'o 'o
 soj qui'yaj suun soj á. Danj inanj
 vaa chrej narque núj rihaan soj asij
 rque á. ¹²Sese danj qui'yaj soj, ne nij
 sí' ne amán rá ni'yaj man Jesucristó
 ro', cataj nij so' se vaa ve'é 'yaj soj ei.
 Ne se cachiin a doj rasuun man
 soj ma'. 'O se ma'an soj nano' rej
 caviǵ rasuun achiin man soj adonj.

**Nana nihánj taj xna'anj daj quirán'
ní' asa' quisíj güii ca'na' uún
Jesucristó rihaan chumií nihánj a**

¹³Me rá núj quene'en soj daj quirán' nij tinúú ní' nij síí noco' man Jesucristó nij síí cavi', tinuj, nocoj. Ne se quinano rá soj che'é tinúú ní' síí cavi' ma'. Dan me se nij síí ne amán rá ni'yaj man Diose ro', nanó ndo'o rá nij so' che'é tuvi' nij so' síí cavi' che'é se taj se qui'yá' cavii sa' tuvi' nij so', rá nij so' a. ¹⁴Tzaj ne cuchumán ya rá ní' se vaa cavi' Jesucristó, ne cunuu i'na' uún so', qui'yaj Diose, ne che'é dan ne'en ní' se vaa xa' nij tinúú ní' síí cavi', tzaj ne che'é se cavi' Jesucristó che'é nij so' ro', che'é dan cunuu i'na' uún nij so', ne ca'na' uún nij so' ga so', qui'yaj Diose adonj.

¹⁵Nihánj me nana cataj xna'anj ma'an síí 'nij ra'a man ní' rihaan núj, ne dan me se asa' quisíj güii ca'na' uún síí 'nij ra'a man ní' rihaan chumií nihánj, ne ní' sij gaa i'na' rihaan chumií nihánj ro', se quitáa yaan ní' rihaan nij síí cavi' ma'. ¹⁶O se caguaj ma'an síí 'nij ra'a man ní' gaa cavii so' rej xta' nanij so' rihaan chumií nihánj, ne caguaj nij se-mozó Diose nij síí uun chij doj, ne ca'yanj se-mozó Diose xrúún Diose chruun a'yánj, gaa ne nij tinúú ní' nij síí canoco' man Jesucristó nij síí cavi' me se asino nij so' cunuu i'na' a. ¹⁷Ne sese gaa i'na' ní' cayáán ní' rihaan chumií nihánj, ne nacaj nij se-mozó Diose man ní', ne cavii ní' rej xta' raá ngaa ga nij síí cunuu i'na' uún, ne nari' tuvi' ní' ga síí 'nij ra'a man

ní' rej xta', gaa ne cayáán ní' ga síí 'nij ra'a man ní' nu' cavii nu' ca'anj nanj adonj. ¹⁸Nihánj me nana cataj xna'anj soj rihaan tinúú soj, ne nari' nucuaj nimán 'o 'o soj, qui'yaj nana nihánj ei.

**Nana nihánj taj xna'anj se vaa xcax
ní' cuentá daj qui'yaj ní' ndaa se
quisij güii ca'na' uún Jesucristó a**

5 Taj che'é cachron núj nana rihaan yanj cartá nihánj cataj xna'anj núj rihaan soj me güii ca'na' uún Jesucristó, man tinuj, man nocoj. ²O se aj ne'en ya soj se vaa ase vaa ne ne'en ní' me güii catuu síí ituu qui'yaj ituu so' ro', danj vaa ne ne'en ní' me güii ca'na' uún síí 'nij ra'a man ní' rihaan chumií nihánj a ma'. ³Dan me se vaa güii cataj yuvii: “Yaj me se dínj vaa rihaan chumií, ne taj che'é cuchu'vi' ní' ma'”, cataj nij yuvii a. 'O se güii yo' me taj ni'yón ase vaa ran' chana' cuchruj ne'ej ro', danj gaa quirán' ndo'o nij yuvii sayuun, ne se quinanii nij so' ma'. 'O se yuun che'e cutuna' nij so' nanj adonj.

⁴Xa' soj, tzaj ne nuveé sij chéé rej rmi' ne acaj cuentá me soj, man tinuj, man nocoj. 'O se güii ca'na' uún Jesucristó me se taj che'é cuchu'vi' soj ndaa vaa chu'vi' nij síí ne'en man síí ituu ma'. ⁵Ino vaa soj rihaan nij síí ne amán rá ni'yaj man Jesucristó ei. Dan me se xa' soj, tzaj ne sij chéé ranga' man naán güii me soj, ne sij acaj sa' cuentá me soj uún, ne nuveé sij chéé rej rmi' do', rej nii do', me soj ma'. 'O se sij chéé rej ranga' me soj ei. ⁶Che'é dan se guun guun ní' síí otoj ndá' rá se vaa 'yaj ta'aj nii ma'. 'O se vaa che'é ni'yaj ranga' rlij

rihaan ní' ei. Se canoco' ní' tucuáan noco' yo'ó nij yuvií mei. Tananj yo'o gaa yu've ní', ne se gaa xno ní' mei. ⁷Dan me se nij síi man rihaan chumii nihánj ro', síi vaj rej rmi' me nij so', ne taj se 'yá' xcaj nij so' cuentá ma'. Che'é dan ase vaa 'o síi otoj nu' do', ase vaa síi xno do', vaa nij so', ne ne ne'en nij so' daj 'yaj nij so' a ma'. ⁸Xa' ní', tzaj ne sij vaj rej ranga' me ní', ne acaj ní' cuentá daj qui'yaj ní' nanj á. Dan me se yo'o gaa nucuaj rá ní' man síi 'nij ra'a man ní', ne gaa 'ee rá ní' man tinúú ní', ne ase vaa aráán rihaan nimán tanuu 'yaj aga' no rucuaa tanuu ro', danj gaa caráán rihaan nimán ní' a. Ne guun ya rá ní' se vaa ya cavii sa' ní', ne ase vaa avii sa' tanuu 'yaj aga' nuu raá tanuu ro', danj gaa cavii sa' ní' che'é se guun ya rá ní' se vaa cavii sa' ní' a. ⁹Nuveé che'e se me rá Diose caxrii yuvaa Diose man ní' me cataj Diose se vaa canoco' ní' man so' ma'. 'O se cataj Diose danj che'é se me rá Diose quinanií ní' rihaan sayuun ne cavii sa' ní' che'é Jesucristó sij 'nij ra'a man ní' adonj. ¹⁰Ne Jesucristó me síi cavi' che'é ní', ne che'é dan ca'vee se cavi' ní', ca'vee se gaa i'na' ní', tzaj ne cayáán rcua'aan cunudanj ní' ga so' adonj. ¹¹Che'é dan ase vaa 'yaj soj cuano ro', danj inanj qui'yaj soj, raj a. Dan me se nago' soj nana sa' man tinúú soj, nari' nucuaj nimán tinúú soj, ne racuíj soj man tinúú soj yan sa' doj canoco' nij tinuj nij soj man Diose á.

**Nana nihánj taj xna'anj se
vaa nago' Pabló chrej man
nu' nij síi noco' Diose a**

¹²Cuano nihánj me cataj xna'anj núj rihaan soj se vaa caraa cochroj

soj rihaan nij síi uun chij rihaan soj, tinuj, nocoj. Dan me se nij so' ro', me síi nicaj yu'unj man soj rihaan síi 'nij ra'a man ní', ne narqué nij so' chrej sa' man soj, ¹³ne 'yaj suun ndo'o nij so' che'é soj, ne che'é dan gaa 'ee rá soj man nij so', ne caraa cochroj soj rihaan nij so' á. Ne ve'é cumán soj ga tinúú soj á. ¹⁴Ne cuano nihánj me cataj xna'anj núj rihaan soj se vaa nago' soj chrej nucuaj man nij síi rmi' se vaa qui'yaj suun nij so', tinuj, nocoj. Sese vaa 'o síi chu'vi' nimán, ne ca'mii soj nana sa' rihaan so', ne nari' nucuaj nimán so', qui'yaj soj á. Racuíj soj man nij yuvií ninaj, ne gaa inaj nimán soj ni'yaj soj man cunudanj yuvií á. Se guun ca'maan ra'yanj rá soj ma'. ¹⁵Tumé soj man soj se guun qui'yaj chi'ii yo'o tuvi' soj man síi 'yaj chi'ii man soj ma'. Maan se inanj suun sa' qui'yaj suun soj che'é tuvi' soj do', che'é cunudanj yuvií do' á.

¹⁶Niganj gaa niha' rá soj, ¹⁷ne se ca'ne' rá soj ga suun achíin ni'yaj rihaan Diose mei. ¹⁸Ne ca'vee se me ma'an sayuun quiran' soj, tzaj ne yo'o nago' soj gracia rihaan Diose á. Danj me rá Diose qui'yaj soj che'é se sij noco' man Jesucristó me soj adonj.

¹⁹Se guun caráán soj chrej rihaan Nimán Diose tucu'yón Nimán Diose nana sa' man soj ma'. ²⁰Se quiri'íj yaníj soj man nana cataj xna'anj naca Nimán Diose rihaan soj ma'. ²¹Tzaj ne xcaj soj cuentá daj vaa 'o 'o nana cuno soj, gaa ne quene'en soj sese ya nana ca'mii Nimán Diose me yo', ne sa' cunuú rá soj nu' nana sa' yo' á. ²²Ne a 'ó se nij se ca'vej rá soj qui'yaj soj ma'. ²³Diose

ro', me síi naqui'yaj xej nimán ní', ne me rá núj cunu sa' inanj nimán soj rihaan so', qui'yaj ma'an so', ne me rá núj tumé Diose man ma'an soj ndaa se quisij güii ca'na' uún Jesucristó sij 'nij ra'a man ní' rihaan chumij nihánj, ne dan me se me rá núj tumé Diose man nimán soj do', man nee man soj do', ne a 'ó cacun' se tumé soj a mei. ²⁴Dan me se Diose me síi nacúun man soj canoco' soj man so', ne vaa che'é gaa nucuaj rá soj man so' se vaa tumé so' man soj adonj.

²⁵Ne cachinj ni'yaj soj rihaan Diose che'é núj, tinuj, nocoj.

²⁶Asa' nari' tuvi' soj ga tinúú ní' síi noco' man Diose, ne ve'é ca'mii soj ga nij so', ne go' soj 'o xto man nij so' rihaan Diose ei. ²⁷Maan che'é se síi'nij ra'a man ní' rqué suun manj, che'é dan me no xcúnj cataj xna'anj 'unj rihaan soj se vaa nayaá soj yanj cartá nihánj rihaan cunudanj nij tinúú ní' síi noco' man Diose ei. ²⁸Ne me rá núj qui'yaj ndo'o Jesucristó sij 'nij ra'a man ní' se luj che'é soj adonj.